

古典文學 第三名 陳勳

個人簡介：國立成功大學中國文學系碩士班一年級
馬來西亞僑生。

邁軸集（節）

庚子疫起，余輾轉英、馬二地，鍵戶三月，索居期年，平日無事，但讀書而已。几案埋首之餘，於家國升沉，大千災眚，不能無感。昔沈濤園云：「人之有詩，如國之有史。國雖板蕩，不可無史，人雖流離，不得無詩。」心波微泛，聊搦管記之，二年來拉雜成編，亦未之重。前夕偶於電腦文件中檢出，展摩今昔，殊堪愴懷。時事無常，豈免顧槐之嘆；死生有命，尚興攀柳之悲。乃刪訂為一編，以所錄皆疫中禁足情事，儼然小隱之跡，竊不自量，取〈考槃〉之意名集，識者哂之可也。

晨興

長安不易居，萬金窮一廛，寄跡囂塵邊，結廬城中嶺。極目天地際，但見平房整，中隔寸寸綠，槎枒鬱不等。環堵水泥墻，車馬喧人境，翛然林泉心，胸中開清景。蕭散遛狗晨，鄰戶省未省，仰探芒果熟，珠露寒衣領。萬物靜葶甲，新藥破泥挺，長風噓夾巷，泠泠薄霧聘。天表敷淺嵐，渾茫接蒼冥，鴉陣掠空逝，隱約數聲警。羲和掣重雲，迤邐萬物屏，巍巍金烏升，娉娉滿俄頃。將軍蕩六合，陽氣橫耿耿，披靡揚鞭處，群小懾威猛。齋息步移晷，的皜灼眼旻，究非無量光，能休疾苦永。投囊徐造家，阿弟夢初醒，吟榻續不成，儉腹亟修綆。聊讀閒情賦，開卷汲古井，闐闐門外嘩，書城且戢影。

飯罷遠眺，見開發商伐林

鼓蛙欣雨噪參差，負手煙茫百感時，老樹經年遺綠處，欲憑斜日已無枝。

小滿即景

棄稿春來又幾斤，暖風催我作詩勤，屬文非為求阿堵，客舍何當種此君。好景眼前疑盡寫，新花罅裡正微醺，偶窺羣蟻南柯下，墜翼爭收往策勛。

元旦瑞雪

殘更聽雪度新年，草木支離凍折天，風定霜寒凝牖下，月移雲影掩扉前。乾坤一色留孤雁，山野無聲漫細泉，遙望不知誰訪戴，幾行屐齒入林煙。

宅居

鍵戶觀書亦寂寥，如何暮暮與朝朝，小樓高臥徒舖歎，廣土空荒正泣號。喘月中宵疑突效，驚弦當午怯低燒，逢人半句交酬盡，話不投機有疫苗。

夜半觀書

夢裡前身玄又玄，鴻濛結習各媿妍，紛繁宏論空中閣，明滅孤檠劫外天。實相解時容敗筆，名心澹處驗佳篇，何勞禪語為詩語，法味無人作鄭箋。

「雙十一」節購書

書癡習氣更無醫，一洗塵勞獨解頤，笑對人詢何太瘦，芸香滿櫃不療饑。

整理插架，戲題一絕

古人追債叩吾廬，驚坐牀頭夢已疏，國課早完差澀阮，偏留數卷殺頭書。

重陽趕論文

昏鐘斜照起車塵，燈下蟲魚小坐春，詩律逢愁偏入古，文思向晚總生新。疫中新解花宜酒，期末難求帽落人，賦菊登高無我事，書山香滿待藏身。

聞俄烏事

霸圖西拓欲何之，曾報當年羅刹師，齊楚敦槃滕間處，金元英蕩宋亡時。劫灰徒博胡僧話，團扇終捐漢帝持，世事化遷還記否，劍南詩與稼軒詞。

評語

李建福老師評語：

五古一首、七律六首、七絕三首，寫新冠疫情生活經歷所感，寫景抒懷俱佳，五古尤善。序亦精當可誦。